

alles mit seiner zugethon auß der Astronomischen Kunst wie ichs angeben hat/ wurden durch ihr handtwerck verrichten / darnach das ich solte die inspection vnd anordnung versehen / damit alles an disem werck gemacht wurde nach dem befelch meiner G. G. S. namlich ein Astronomisch Uhrwerck anrichten vnd anordnen/ das dem Tempel zierlich vnd der Statt Straßburg thümlich were. Wann auch daran etwas von den Uhrenmacher/ für welche ich gut bin worden / das sie solches wurden volbringen/ were versaumet oder aber nit noch meiner G. G. S. befelch gemacht were worden/ kan ein jeder wol erachten/ das solches mir wurde heim gewisen sein/ vnd hette ich/ dem das ganz werck vertraut war/ müssen rechnung schafft darumb geben. Welche sorg vnd andere zufell so hernaher mir begegnetē mich in ein krankheit brachten / vnd wardt von wegen des grossen last / den ich auff mich geladen / auch anderer beschwerdt verursacht vmb hilff vmbzulügen.

Derhalben als ich ein guten vertrauten freünd hat / dem ich solches vertrauen kundte vnd wußte/ vnd zu der selbigen zeit sich zu Augspurg hielte M. David Wolckenstein von Preßlaw / hab ich freündtlichen an ihn geschriben / fleissig gebetten/ er wolte mir zugefallen sein / vñ auff meinen kosten alher ziehen / mir behülfflich sein in disem grossen thun / vnd das werck zu ende helffen führen/ ich